

**Pertandingan Satu Lawan Satu Bagi Jawatan Pengerusi Gerakan Pulau Pinang  
Bernama  
8 Sept, 2013**

GEORGE TOWN, 8 Sept (Bernama) -- Jawatan Pengerusi Gerakan Pulau Pinang akan menyaksikan pertandingan satu lawan satu antara bekas Pengerusi Barisan Nasional (BN) negeri Teng Chang Yeow serta Ketua Biro Undang-undang dan Hak Asasi Manusia Gerakan negeri, Baljit Singh pada pemilihan parti 15 Sept ini.

Proses pencalonan yang turut membabitkan enam kerusi anggota jawatankuasa serta lima wakil nasional itu berlangsung di ibu pejabat Gerakan di Jalan Macalister di sini, ditutup pada 12 tengah hari tadi.

Sebanyak 14 calon menyerahkan borang pencalonan masing-masing bagi merebut enam tempat sebagai anggota jawatankuasa negeri.

Mereka ialah Dr Lim Boon Ben, Goh Kheng Sneah, Dr Thor Teong Gee, Tan Kah Leong, Ng Siew Lai, M. H. Puvaniten, Sim Song Goun, Lee Boon Ten, Teh Kheng Siong, Heah Theng Hwang, Teoh Hang Chong, Choo Chin Nam, H'ng Khoon Leng dan Yew Khean Siang.

Sebanyak lapan calon pula bertanding untuk mewakili Gerakan Pulau Pinang ke persidangan perwakilan peringkat pusat yang akan berlangsung pada 26 Okt depan.

Mereka ialah Dr Teng Hock Nan, Ooi Ah Bee, A. R. Velu, Tan Chuan Koon, Chan Kim Beng, Tan Chee Heong, Tian@Thain Hang Wei dan Chuah Seong Lee.

Bercakap kepada pemberita selepas pencalonan itu, Teng berkata beliau bertanding kerana mahu membina dan memulih parti tersebut dalam usaha mengembalikan keyakinan rakyat terhadap Gerakan.

"Anggota akar umbi meminta saya kembali dalam hierarki kepimpinan parti," katanya.

Pada 5 Mei lepas, Teng mengumumkan peletakan semua jawatan dalam parti dan Pengerusi BN Pulau Pinang berikutan kekalahan teruk Gerakan di negeri itu pada pilihan raya umum lepas.

-- BERNAMA

Copyright © 2013 BERNAMA

Source: <http://www.bernama.com/bernama/v7/bm/newsindex.php?id=976125>